

কনকাঞ্জলি

BANGLADARSHAN.COM

অক্ষয় কুমার বড়াল

# উৎসর্গ

বিস্বহরিলাল চক্রবর্তী

১১ই জ্যৈষ্ঠ, ১৩০১

নহে কোন ধনী, নহে কোন বীর,  
নহে কোন কস্মী-গর্বোন্নত-শির,  
কোন মহারাজ নহে পৃথিবীর,  
নাহি প্রতিমূর্তি ছবি ;  
তবু কাঁদ কাঁদ, -জনম-ভূমির  
সে এক দরিদ্র কবি।

এসেছিল সুধু গায়িতে প্রভাতী,  
না ফুটিতে উষা, না পোহাতে রাতী -  
আঁধারে আলোকে, প্রেমে মোহে গাঁথি',  
কুহরিল ধীরে ধীরে ;  
ঘুম-ঘোরে প্রাণী, ভাবি' স্বপ্ন-বাণী,  
ঘুমাইল পার্শ্ব ফিরে'।

দেখিল না কেহ, জানিল না কেহ,-  
কি অতল হৃদি, কি অপার স্নেহ !  
হা ধরনী, তুই কি অপরিমেয়,  
কি কঠোর, কি কঠিন !  
দেবতার আঁখি কেন তোর লাগি'  
রহে জাগি নিশিদিন ?

মৃত তোর ভক্ত, কাঁদ, মা জাহ্নবী,  
মৃত তোর শিশু, কাঁদ, গো অটবী,  
হে বঙ্গ-সুন্দরী, তোমাদের কবি  
এ জগতে নাই আর।  
কোথায় সারদা-শরতের ছবি,  
পর বেশ বিধবার।

কাঁদ, তুমি কাঁদ। জুলিছে শ্মশান, –  
কত মুক্তা-ছত্র, কত পুণ্যগান,  
কত ধ্যান জ্ঞান, আকুল আহ্বান  
অবসান চিরতরে !

পুণ্যবতী মার পুত্র পুণ্যবান  
ওই যায় লোকান্তরে !

যাও, তবে যাও। বুঝিয়াছি স্থির, –  
মানব-হৃদয় কতই গভীর ;  
বুঝেছি কল্পনা কতই মদির,  
কি নিষ্কাম প্রেমপথ !  
দিলে বাণীপদে লুটাইয়া শির,  
দলি' পদে পর-মত।

বুঝায়েছ তুমি, –কত তুচ্ছ যশ ;  
কবিতা চিন্ময়ী, চির-সুখা রস ;  
প্রেম কত ত্যাগী –কত পরবশ,  
নারী কত মহীয়সী !  
পুত ভাবোল্লাসে মুগ্ধ দিক্-দশ,  
ভাষা কিবা গরীয়সী !

বুঝায়েছ তুমি, –কোথা সুখ মিলে –  
আপনার হৃদে আপনি মরিলে ;  
এমনি আদরে দুখে বরিলে  
নাহি থাকে আত্ম-পর  
এমনি বিস্ময়ে সৌন্দর্য্যে হেরিলে  
পদে লুটে চরাচর।

বুঝায়েছ তুমি, –ছন্দের বিভবে ;  
কি আত্ম-বিস্তার কবিত্ব-সৌরভে ;  
সুখদুঃখাতীত কি বাঁশরী-রবে  
কাঁদিলে আরাধ্যা লাগি' !  
ধন জন মান যার হয় হবে –  
তুমি চির-স্বপ্নে জাগি !'

তাই হোক, হোক। অনন্ত স্বপনে  
জেগে রও চির বাণীর চরণে –  
রাজহংস সম, চির কলস্বনে,  
পক্ষ দুটা প্রসারিয়া ;  
করণাময়ীর করুণ নয়নে  
চির স্নেহরস পিয়া !

তাই হোক, হোক। চির কবি-সুখ  
ভরিয়া রাখুক সে সরল বুক !  
জগতে থাকুক জগতের দুখ,  
জগতের বিসংবাদ ;  
পিপাসা মরুক, ভরসা বাডুক,  
মিটুক কল্পনা-সাধ।

তাই হোক, হোক। ও পবিত্র নামে  
কাঁদুক ভাবুক নিত্য ধরাধামে !  
দেখুক প্রেমিক, – সুগভীর যামে,  
স্বপনে জগৎ ঢাকি’  
নামিছে অমরী, ওই সুর ধরি’  
আঁচলে মুছিয়া আঁখি।

তাই হোক, হোক। নিবে চিতানল,  
কলসে কলসে ঢাল শান্তিজল !  
দুখ-দক্ষ প্রাণ হউক শীতল –  
কবি-জনমের হাহা !  
লও-লও, গুরু, মরণ-সম্বল –  
জীবনে খুঁজিলে যাহা !

BANGLADARSHAN.COM

# উপহার

ধর, সখী, কনক-অঞ্জলি।  
নহে ইহা ফুলমালা—  
আসি নাই দিতে জ্বালা ;  
এসেছি বিদায় নিতে, কেঁদে যাব চলি'।  
তুলিব না পূর্ব-কথা,  
সে কেবল মর্মে-ব্যথা ;  
নাহি সে সময় আর, কারে কিবা বলি' !  
অদৃষ্ট-ঝটিকা-ঘায়  
শুষ্ক পত্র উড়ে যায়,  
কর্দমে তরুর মূলে, তুমি কুন্দকলি,  
ধর, ধর হৃদয়-অঞ্জলি !  
কি দিয়ে শোধাবে দীন  
তোমার অশেষ ঋণ !  
তবু দিল—যাহা ছিল, মর্মে মর্মে জুলি'।

BANGLADARSHAN.COM

# কত দিন পরে

কত দিন পরে আজ – কত দিন পরে,  
সে স্মৃতি-কুহকে চিত চমকে আবার !  
বিশীর্ণ কল্পনা-ফল্ল, কি উচ্ছ্বাস-ভরে,  
ছুটিছে কল্লোলি' আজ প্লাবি' পারাপার !  
সে চির-মিলন-আশা, দূর বনান্তরে,  
মাধবী-বাসর-কুঞ্জ রচিছে আমার !  
জাগিছে সে প্রেম-স্বপ্ন নব কলেবরে, –  
তরল জ্যোৎস্নায় হেরি' তোমার আকার !  
ঘুমায়ে পড়েছে দূরে জগৎ সংসার, –  
পত্রে পুষ্পে সমাবৃত, মলয়-নিঃশ্বাসে !  
বিমূঢ় হৃদয় ভাবে, – কোথা ভাষা তার !  
কি দিয়া নবীন পিক বসন্তে সম্ভাষে ?  
জানি, – কি বলিতে চাই ; জানি না, – কি বলি !  
ক্ষম' এই অক্ষমতা ; – সত্যে নাহি ছলি।

BANGLADARSHAN.COM

# কবি

সরল-হৃদয় কবি—  
যেখানে মাধুরী-ছবি,  
সেখানে আকুল।  
পূর্ণিমায় নদীকূলে,  
উষালোকে তরুমূলে  
কত বকে ভুল।

প্রজাপতি, মৃগ-আঁখি,  
ফুলে অলি, ডালে পাখী,  
গাছে গাছে ফুল,  
দুলে লতা তরু-বুকে,  
চকাচকি মুখে-মুখে—  
দেখিলে ব্যাকুল।

রমণী, তোমারে চেয়ে,  
ভেবো না, কি গেল গেয়ে,  
কি বকিল ভুল !

সরল-হৃদয় কবি—  
যেখানে মাধুরী-ছবি,  
সেখানে আকুল।

BANGLADARSHAN.COM

# সুখ

এমন চঞ্চল কেন সুখ,  
নদী-বুকে যেন ক্ষুদ্র ঢেউ ;  
ব্যাকুল লুকাতে সদা মুখ –  
ধরার সে নহে যেন কেউ !

একা সুখ নাহি পায় সুখ,  
তাই সদা পরমুখ চায় ?  
তাই কেঁদে ডাকে শত দুখ ?  
বাস যথা আপনা বিলায়।

রমণী, তোমার মুখ হেরে',  
সুখ বুঝি এত সুখ পায় –  
অত সুখ সহিতে না পেরে,  
আত্মঘাতী হ'য়ে ম'রে যায় !

BANGLADARSHAN.COM

# বাঁশরী-স্বরে

বাঁধিতেছিলাম মন আপন ঘরে—

কেন গৃহ ছাড়িলাম বাঁশরী-স্বরে !

সম্মুখে প্রমোদ-বন,

ফুটে ফুল অগণন,

উড়ে অলি, নাচে শিখী, হরিণী চরে ;

কেন গৃহ ছাড়িলাম বাঁশরী-স্বরে !

সমীর সুরভি-ভরে

ফুলে ফুলে ঢলে' পড়ে,

মৃদু কাঁপে তরু-লতা, পিক কুহরে !

আকাশে তারকা কত

চেয়ে প্রেমিকার মত,

ঢলিয়া পড়েছে শশী মেঘের থরে।

স্রোতস্বিনী কলস্বরী,

আসে উষা মনোহরা—

আর তার রূপচ্ছটা মেঘে না ধরে !

এ যে রে সুখের ধরা,

প্রেমের স্বপনে ভরা—

কার বাঁশী গেয়ে গেল কাহার তরে !

বাঁধিতেছিলাম মন আপন ঘরে।

BANGLADARSHAN.COM

## পথে

কেন সে চমকি' ত্রাসে চেয়ে গেল রে !  
যেন, মধুর শেফালি-বাসে ছেয়ে গেল রে !  
যেন, সুদূর কানন-কথা,  
প্রভাত-কাকলি-সম,  
সমীর গ্রামের ধারে গেয়ে গেল রে !  
যেন, গভীর বরষা-রাতে,  
মেঘের আড়াল হ'তে  
জগতের পানে চাঁদ চেয়ে গেল রে !  
ভোরে, আধ-ঘুম-ঘোরে,  
বাঁশীর গানটী যেন,  
ধরি-ধরি না ধরিতে ধেয়ে গেল রে !  
সুধু একটু অবশ সুখ,  
একটু অলস দুখ,  
একটী স্বপন-প্রাণ পেয়ে গেল রে !

BANGLADARSHAN.COM

# আঁখি

[ শেলির ভাবানুকরণ ]

আঁখির কি আশা !  
প্রভাত-কমল, রসে ঢল-ঢল,  
চেয়ে চেয়ে রবি-পানে-মিটে না পিপাসা,  
সারাদিনে মিটে না পিপাসা !

আঁখির কি ভাষা !  
পাগল কবির প্রলাপ-সঙ্গীতে  
নাহি ফুটে এত ভালবাসা !

একবার চাও !  
এ বিষণ্ণ হৃদি 'পরে-অশ্রু-হারা মেঘ-স্তরে  
ইন্দ্রধনু বারেক ফুটাও !  
এ জীবন-বর্ষা-শেষে-আলো-মাখা বৃষ্টি-বেশে  
দুই দুই খেলি একবার,  
আঁখিতে তোমার !

BANGLADARSHAN.COM

## দেখা

নয়নে নিমেষ নাই, কথা নাই মুখে,  
চেয়ে আছি,—বুঝিতেছি ; কাঁপিতেছি বুকো।  
বুঝিতেছি,—দেহ চায় দেহের পরশ ;  
দাঁড়াইয়া আছি কাছে,—সে যে দুঃসাহস !  
দুটা মূর্তি—ছায়া সম ফুটে হৃৎ-কোলে,—  
বুকে বুকে দৃঢ় বাঁধা, কপোলে কপোলে ;  
সুখে স্বপ্নে অবসন্ন, অবশ শরীরে  
জড়ায়—জড়ায় যেন মরিবে অচিরে।

## দেখ

এই দেহ,—অতি সুকুমার।  
নিজ অনুরূপ করি’,  
আদরে যতনে গড়ি’

দেখান বিধাতা যাহে রূপ আপনার।  
এত তরঙ্গের ভঙ্গ,  
এত কুসুমের রঙ্গ,—  
ঘৃণায় কি দেখিলে না তুমি একবার !

এই মন,—অনুপম ভবে।  
অলক্ষ্যে অমরী কত  
আসে যায় অবিরত,  
সম্মুখে ভুলিয়া যায় নন্দন-বিভবে।  
এত প্রেম, এত আশা,  
এত সুর, এত ভাষা,  
নিজ করে গড়ি’—কেন হারাও গরবে !

# যদি

আমি যদি হ'তেম ভূপতি,  
তুমি হ'তে অনাথা রমণী ;—  
দাঁড়ালে আমার দ্বারে,  
দিতাম যে একেবারে  
তোমার চরণতলে সমগ্র ধরণী !

আমি যদি হ'তেম দেবতা,  
তুমি যদি কেঁদে একবার  
চাহিতে আকাশ-পানে !  
আমি যে বিহ্বল-প্রাণে  
পড়িতাম স্বর্গ হ'তে চরণে তোমার !

তুমি যদি হইতে পুরুষ,  
আমি যদি হইতাম নারী ;—  
দেখিলে ও ম্লান মুখ,  
শতধা হইত বুক,  
শতকণ্ঠে বলিতাম,—‘আমি যে তোমারি !’

BANGLADARSHAN.COM

# গেছে

[ রবার্ট ব্রাউনিং-এর ভাবানুকরণ ]

এই পথ দিয়ে গেছে, –এখনো যেতেছে দেখা  
শত শুভ্র তৃণ-ফুলে চরণ-অলঙ্ক-রেখা।  
এই পথ দিয়ে গেছে, –চেয়ে চেয়ে চারি দিকে,  
এখনো হরিণী চেয়ে পথ-পানে অনিমিখে।

এই পথ দিয়ে গেছে, –ছিঁড়ে' পাতা তুলে' ফুল ;  
নাড়া পেয়ে নাড়া দেয় এখনো বিহগকুল।  
এই পথ দিয়ে গেছে, –গেয়ে গেয়ে মৃদু গান,  
এখনো বাতাসে কাঁপে সেই গুন-গুন তান।

এই পথ দিয়ে গেছে, –ব'সে গেছে নদীকূলে,  
গেঁথে গেছে ফুলমালা, পরে' যেতে গেছে ভুলে।

এই পথ দিয়ে গেছে, –কেঁদে গেছে তরুতলে,  
এখনো সে অশ্রুকাণ্ডা মিশে নি শিশিরদলে ;

কোথায় যেতেছে চলে', –কে আমারে বলে' দেয় ?  
এ অশ্রু কে মুছে দেবে, এ মালা কে তুলে' নেয় ?  
কি তার মনের কথা ? আমি ত জানি না কিছু !  
কে দেখেছে তার মুখ ? আমি যে রয়েছি পিছু।

BANGLADARSHAN.COM

## প্রত্যহ

চাহিয়া উষার পানে বলি যে হাসিয়া, –  
স্বপন সফল হবে আজ !  
আশায় বাঁধিয়া বুক থাকি যে বসিয়া,  
সারাদিন শূন্যগৃহ-মাঝ।  
–ফুরায় না তার গৃহ-কাজ !  
সন্ধ্যায় নিঃশ্বাস ফেলি, –জীবন বিফল !  
কি কঠোর নারীর অন্তর !  
চাহিয়া আকাশ-পানে নয়ন নিশ্চল ;  
ঝরে অশ্রু, হৃদয় কাতর।  
–নাহি তার ক্ষণ-অবসর !

## BANGLADARSHAN.COM

### তার স্মৃতি

সংসারের আপদে বিপদে  
ভাবি যবে, –মঙ্গল মরণ ;  
তার স্মৃতি, এসে আচম্বিতে,  
বলে হেসে, –‘মধুর জীবন !’  
আছে তার স্মৃতি,  
বাঁচিব গো স’য়ে।

সংসারের আনন্দে সম্পদে  
ভাবি যবে, –মধুর জীবন ;  
তার স্মৃতি, হৃদয়-নিভূতে,  
বলে কেঁদে, –‘মঙ্গল মরণ !’  
কোথায় বিস্মৃতি !  
বাঁচিব কি ল’য়ে ?

# সন্ধ্যায়

আয় স্মৃতি, প্রীতির নন্দিনী !  
পর্বত-শিখর হ'তে – তটিনীর কলস্রোতে  
শুনিতেছি যেন তোর মৃদু পদধ্বনি।  
তরুর মৃদুল শ্বাসে, ফুলের মধুর বাসে,  
সন্ধ্যার বাতাসে যেন তোর কণ্ঠ শুনি।  
আয় স্নেহরাণী !

আয় স্নেহরাণী !  
জেগে জেগে সারাদিন অতি শ্রান্ত, দীনহীন  
ঘুমায়ে পড়েছে বুক কল্পনা-কামিনী ;  
মুখখানি তুলে' তার, ডাক তারে একবার,  
উঠিলে উঠিতে পারে তোর কণ্ঠ শুনি'  
আয় স্নেহরাণী !

আয় স্নেহরাণী !  
কত-না যতন করে' পেতে দেখি তোর তরে  
কোমল অশ্রুর শয্যা – ভাঙ্গা হৃদিখানি।  
আয়, বুক শুয়ে থাক, এ জীবন হ'য়ে যাক  
বরষা-রাতের এক স্বপন-কাহিনী !  
নিশি যেন না পোহায়, পাখী যেন নাহি গায়,  
আঁধারে মিলায়ে যায় জীবন এমনি !  
আয় স্নেহরাণী !

BANGLADARSHAN.COM

# স্বপ্ন-রাণী

ঘুমন্ত চাঁদের বুক হ'তে,  
ভেসে ভেসে জোছনার স্রোতে,  
মুক্ত বাতায়ন দিয়া, তরাসে কস্পিত-হিয়া,  
আসি, প্রিয়, তোমায় দেখিতে !  
ধীরে পড়ে বায়ুর নিঃশ্বাস,  
মৃদু কাঁপে ফুলের সুবাস ;  
ছোট ছোট তারাগুলি ঘুমে পড়ে ঢুলি' ঢুলি',  
কাঁপে চোখে সরমের হাস।  
নদী-পারে ডাকে পাখী আধ-ঘুমে থাকি' থাকি',  
কুল-কুল নদী বহে' যায় ;  
তীরে তীরে তরু-কোলে কুসুমিতা লতা দোলে,  
জগৎ ঘুমায়।

আসি, প্রিয়, দেখিতে তোমায় !

যখন গো হৃদয় ঘুমায়—  
বাসনা ঘটনা যত, সমীরে সুরভি মত,  
নীরবে দুটীতে মিশে যায় ;  
ভাসা-ভাসা কথা শত, নদীতে চে'য়ের মত,  
হেথাহোথা ভাসিয়া বেড়ায় ;  
কে আপন, কেবা পর, কাহারে করিবে ভর —  
হৃদয় বুঝিতে নাহি চায় !  
স্বপনের মত হ'য়ে, হাতে প্রেম-মালা ল'য়ে  
আসি, প্রিয়, দেখিতে তোমায় !  
আসি, প্রিয়, দেখিতে তোমায় !  
যাই-যাই, নাহি বল, চোখে ভরে' আসে জল,  
হৃদয় কাঁপিয়া উঠে সন্দেহে লজ্জায়।  
আর বার মনে হয়, — কেন লজ্জা, কেন ভয় ?  
নয়নে লিখিয়া দেই অলক্ষ্য চুম্বনে,—  
যে প্রেম ফুটে না কভু নারীর বচনে !

# প্রভাতে

কে ভাঙ্গিল হৃদয়-কানন ?

সাধের অস্ফুট ফুল-বন !

না জানি কে দেববালা

ভরিতে ফুলের ডালা,

এসেছিল নিশীথে কখন !

শাদ্বলে যেতেছে দেখা

ঈষৎ গুল্ফের লেখা ;

শিলাসনে তনু-নিরুপণ।

পূর্ণিমায় ফুল্ল হিয়া,

দেখে নাই বিচারিয়া, –

ছিঁড়েছে মুকুল অগণন !

কে জানে নারীর খেলা,

কিসে সাধ, কিসে হেলা –

কে জানে কেমন নারী-মন !

কোন কথা নাহি বলি’,

পদতলে গেল দলি’

কত শ্রম, বাসনা, যতন !

BANGLADARSHAN.COM

# নিদাঘে

দিয়েছিলে জ্যোৎস্না তুমি, নিয়ে আছি অন্ধকার ;  
দিয়েছিলে ভালবাসা, নিয়ে আছি হাহাকার।  
তুমি বেঁধেছিলে বীণা, আমি যে ছিঁড়েছি তার, –  
ভ্রমর গুঞ্জন করি' আসে না ত কাছে আর !

উষার মতন হেসে–ধরা আলো করে' এলে,  
গেলে বিদ্যুতের মত, –শত বজ্র পাছে ফেলে !  
কোথা সে প্রভাত-স্বপ্ন, কোথা সে সন্ধ্যার গান,  
কোথা সে পূর্ণিমা-নিশি–চেয়ে চেয়ে অবসান !

এস বর্ষা, এস তুমি, –তুমি নিদাঘের শেষ,  
ল'য়ে এস অন্ধ নিশা–ঘুচাও এ মৃত্যু-ক্লেশ !  
তৃষায় ফাটিছে প্রাণ–কোথা প্রেম-পুণ্যজল !  
চারি দিকে মরীচিকা হাসিতেছে খল-খল।

BANGLADARSHAN.COM

# দুঃখ

গোলাপ সুন্দর অতি,  
সকণ্টক বৃন্তে ফুটে ;  
নির্ব্বর মধুর-গতি,  
রুম্ব গিরিপথে ছুটে ;  
কমল সুগন্ধে ভরা,  
জনমে পঙ্কিল সরে ;  
ঘুরে জীব-পূর্ণ ধরা,  
জীব-শূন্য কক্ষ 'পরে।

কোকিল-অখিল-রব,  
শীতের মরণে উঠে ;  
তারকা-খচিত নভ  
অমার আঁধারে ফুটে ;  
শশিকলা মনোহরা  
লুটে অন্ধ মেঘদলে ;  
সহি' শত মৃত্যু-জরা,  
আসে জীব ধরাতলে।

ঝটিকার পাছে আসে  
হিল্লোলি' সমীর ধীর ;  
বন্যার প্লাবন-পাশে  
কল্লোলি' শীতল নীর ;  
রণ পরে শান্তি-সুখ,  
ভ্রান্তি পরে স্বস্তি-গান ;  
তাপ-দক্ষ প্রৌঢ়-বুক  
শিশুর ক্রীড়ার স্থান।

মুছি তবে নেত্রজল-  
অদৃষ্টের এ বিপাক !  
ভাঙ্গে যদি মর্ম্মস্থল-  
কি করিব ?-ভেঙ্গে যাক !

BANGLADARSHAN.COM

নিশার পাণ্ডুর মুখ,  
হেরি' দূরে সূর্য্যরথ ; -  
যুবুক-যুবুক দুখ  
সুখে মোর দিতে পথ !

দহিয়া বিরহ-দাহে  
হোক আরো শুদ্ধ প্রাণ ; -  
প্রেমময়ী, পার যাহে  
করিবারে অধিষ্ঠান !  
কত যুগে-দাও বলে',  
কিংবা জন্ম পরে কত -  
কত দুখে জ্বলে' জ্বলে'  
হব তব মনোমত !

BANGLADARSHAN.COM

# কাঁদিতে পার

কাঁদিতে পার' গো যদি চিরকাল নিতি নিতি,  
এস তবে এস, সখা, দুজনে করি পিরীতি ।

মিলনে নাহিক সাধ,  
সে কেবল অপবাদ ;

র'ব মোরা দূরে দূরে, র'বে সুধু সুখ-স্মৃতি !

মিলনের তরে মন কাঁদিবে আকাশে চাহি',  
বুঝাইব দীর্ঘশ্বাসে, –জগতে মিলন নাহি !

এ ধরা মাটিতে গড়া,  
নর-নারী স্বার্থে ভরা ;

এ নহে নন্দন-বন হেথা আছে লোক-ভীতি !

চোখে উছলিবে জল, মুখে ফুটিবে না কথা,  
অন্তরে পিপাসা আশা, সম্মুখে বিরহ-ব্যথা।

কাছে আছ, তবু নাই !  
আরো চাই–আরো চাই !

দিয়েছ, নিয়েছ সব–তবুও অভাব-গীতি !

মিলন নরক-দাহ–আমরণ হাহাকার,  
নিমেষ-চঞ্চল-সুখে বুকুে চির অগ্নি-ভার।

বিরহ-মথিত প্রেম,  
অনল-কষিত হেম !

দিও না কলঙ্ক-ডালি তুলে' শিরে, হে অতিথি !

এ নহে প্রেমের রীতি।

# অশ্রু

হৃদয়ে বেঁধেছি, সখী, বল ;

মুছ আঁখি-জল।

দাও-দাও, ছেড়ে দাও, যেথা ইচ্ছা –দূরে যাও ;

প্রেম যদি কলঙ্ক কেবল–

এ প্রেমে কি ফল ?

যদি এ মমতা-মায়া, – সুধু আলেয়ার ছায়া,

জীবন শাশান করি’, –বিভীষিকা-স্থল ; –

এ প্রেমে কি ফল ?

মুছ আঁখি-জল।

ওই বিন্দু-মুকুতায় ব্রহ্মাণ্ড গলিয়া যায় –

এখনি সঙ্কল্প হবে নিমেষে বিফল !

সংযম হারাবে মন, – গ্রহে গ্রহে সংঘর্ষণ,

জগতে উঠিবে জুলি’ প্রলয়-অনল !

মুছ আঁখি-জল।

BANGLADARSHAN.COM

# এত বুঝি

এত বুঝি, এত সহি,  
তবু তবু-প্রেমময়ী !  
আবার সে ভুল !  
আবার মিলন-আশে,  
আবার বিরহ-শ্বাসে  
হৃদয় ব্যাকুল।

আবার ভাবিছে মন, –  
এই প্রিয়া-সম্বোধন,  
এই দীর্ঘশ্বাস,  
পার হ'য়ে গিরি-নদী,  
তব কর্ণে পশে যদি –  
কি অদ্ভুত আশ !

বিরক্ত কি হবে তায় ?  
বায়ু ত লইয়া যায়  
কত পিক-স্বর ;  
চন্দ্রমা ত দূরে র'য়ে  
চেয়ে থাকে মুগ্ধ হ'য়ে –  
আমি শুধু পর !

নদী মত উছলিয়া  
পড়ি না চরণে গিয়া,  
লুটায় হৃদয় !  
সার্থক হউক জন্ম,  
সার্থক এ ধৈর্য্যধর্ম্ম,  
সার্থক প্রণয় !

এ কি-এ কি আশা-ঘোর !  
কোথা সে দৃঢ়তা তোর,  
হা বিকল মন !

BANGLADARSHAN.COM

সহিতে জন্মোছি ভবে  
আমৃত্যু সহিতে হবে—  
কেন দুঃস্বপন ?

হও, মন, হও স্থির,  
হের-হের কি গম্ভীর  
মরু-অহরহ ;  
কি নিষ্কাম মহাতপ,  
কি নীরব মন্ত্র-জপ,  
কি আত্ম-নিগ্রহ !

ভয়ে জীব যায় দূরে,  
নিঃশ্বাসে ঝটিকা উড়ে,  
দৃষ্টিতে প্রলয় ;  
বুকে চির মরীচিকা—  
নাহি ত্যাগ-অহমিকা !

—প্রণম, হৃদয় !

BANGLADARSHAN.COM

## ও কথা

ও কথায় কাজ নাই আর।  
আকাশে না দেখি ইন্দু,  
এখনি হৃদয়-সিন্ধু  
কাঁদিলে করিয়া হাহাকার !

ও কথায় কাজ নাই আর।  
হেমন্ত কুয়াসা মত—  
ক্রমশঃ বাসনা যত  
হতেছে অস্পষ্ট অন্ধকার।

ও কথায় কাজ নাই আর।  
ডুবিতেছে কাল-নীরে,  
ডুবে' যাই ধীরে ধীরে ;  
কার আশা—কেন হাহাকার ?

BANGLADARSHAN.COM

# যাই

তরণী বাহিয়া,  
তরুচ্ছায়া দিয়া।  
পশ্চিম-আকাশে  
মেঘ-খণ্ড ভাসে ;  
অরণ্য দু'ধারে  
শ্বসিছে আঁধারে।

ভগ্ন উচ্চ তীর, –  
কৃষক-কুটীর ;  
তুলসীর তলে  
সন্ধ্যাদীপ জ্বলে।

দীর্ঘশ্বাস সনে  
কত ভাবি মনে, –  
কৃষক-সংসার,  
আর-আর-আর।

ঘুরি যাহা খুঁজি', –  
হেথা আছে বুঝি !  
সে উপকথায়  
দিন যেন যায় !

বাহি তরী ধীরে, –  
নিস্তরু তিমিরে  
অশ্বখ নিবিড়  
প্রাচীন মন্দির।  
পলাল শৃগাল,  
ডাকে ফেরুপাল।

গ্রাম-মধ্য হ'তে  
আসে বায়ুস্রোতে  
সংকীর্তন-ধ্বনি–

গভীরা রজনী।

অবসন্ন মন,—

এই কি জীবন ?

## আয় ঘুম

আয়, ঘুম আয় !

চেয়ে আছি সারা রাত, বুক দুটী দিয়ে হাত,

দীর্ঘশ্বাসে বুক ভেঙ্গে যায়।

আয়, ঘুম আয় !

ফুটে ডুবে কত তারা, ক্ষীণ শশী রশ্মি-হারা,

হিম-স্তব্ব বায় ;

তরলতা উঠে শ্বসি', পত্র পুষ্প পড়ে খসি',

তটিনী উছলি' পড়ে পায়—

রজনী পোহায়।

আয়, ঘুম আয় !

বড় শান্ত আমি এ ধরায়।

বড় শান্ত চেয়ে চেয়ে, বড় শান্ত গেয়ে গেয়ে —

সুখে, দুখে, প্রেমে, কল্পনায়।

বুকে মাথা রাখ ভুলে', অকূলে দেখা রে কূলে !

ঢাক স্নেহ-ছায়।

আয়, ঘুম আয় !

যুথিকা শুকায়, ঢাকিস পাতায় ;

ঢেকে দে আমায় !

বিষণ্ণ তারকা মেঘে দিস ঢাকা ;

ঢেকে দে আমায় !

ধরণী লুকায়, তটিনী লুকায়,

তোর কুয়াসায় ;  
লুকা' রে আমায় !  
জগতের দূরে, ওই মেঘ-পুরে,  
নিয়ে যা আমায়—  
এ জগৎ হোক তোর স্বপ্ন-লোক —  
রচিত মিথ্যায় !

## অবশেষ

ধীরে ধীরে, নেমে নেমে, থামিয়া গিয়াছে গান ;  
বুকে ঘুরে পথ-হারা এখনো একটা তান।  
কবিতা গিয়েছি ভুলে,  
দুটা ছত্র মনে দুলে ;  
মুছিয়াছি আঁখি, তবু—আসে অশ্রু আঁখি-কোণে ;  
অলক্ষিতে পড়ে শ্বাস, শূন্যে চাই শূন্যমনে।  
শুকায়েছে ফুল-হার,  
একটু সুবাস তার  
এখনো বাতাসে যেন আসিতেছে ভাসি' ভাসি' ;  
যে যাহার গেছে চলে',  
আমি পড়ে' তরুতলে ;  
ডুবিয়া গিয়াছে জ্যোৎস্না—সম্মুখে আঁধার-রাশি।  
ডুবিলে রক্তিম রবি, পশ্চিমে সাঁঝের বেলা  
দুটা শেষ-রশ্মি-রেখা খেলে ত মরণ-খেলা !  
আকাশে চন্দ্রমা-হারা—  
পড়ে' থাকে শুক-তারা ;  
বিজলী ছলিয়া যায়, কাঁদে মেঘ ঝরি' ঝরি' ;  
বসন্ত জুলিয়া যায়, থাকে শুষ্ক পাতা পড়ি'।  
স্বপন চলিয়া যায়,  
তন্দ্রা করে হয় হয় !  
প্রিয়তমা চলে' গেছে, পড়ে' আছে প্রেম-স্মৃতি—

কখনো কল্পনা সম, কখনো কবিতাকৃতি !

## আমার এ কাব্যে

আমার এ কাব্যে আজ, –আপনা হারিয়ে,  
দেছি মোর সর্বস্ব জড়িয়ে !  
যদি এ কবিতা সম  
হ’তে তুমি, প্রিয়া মম,  
কোন দিন ভেঙ্গে-গড়ে’ –হৃদয় তোমার  
লইতাম করি’ আপনার !

বৃথা গাঁথি ভাবে শব্দে –তুমি কত দূরে,  
না জানি কাহার অন্তঃপুরে !  
নিশীথে পাপিয়া তানে  
এ গান কি পশে কাণে ?  
এ প্রেম কি জাগে প্রানে, –হেরি’ নিশা-শেষে  
ম্লান জ্যোৎস্না পড়ি’ দ্বারদেশে ?

কোন দিন কাব্যখানি –দিন যদি পায় –  
হাতে শুয়ে মুখ-পানে চায় !  
আগ্রহে আশায় ভুলি’  
চাহিবে কি বর্ণগুলি ?  
কাঁদিবে কি ছত্রগুলি বিরহ-ব্যথায় –  
চিত্ত মোর পাতায় পাতায় ?

BANGLADARSHAN.COM

# কবিতা

আসিছে কিশোরী, বনপথ দিয়া,

নতমুখী কত লাজে !

নবীন হৃদয়ে নবীন প্রণয়

মৃদুল মধুর বাজে।

কটিতটে দুলে মাধবী-মেখলা,

উরসে বেলার মালা ;

নীল-বাসে ঢাকা তনু-গৌরীলতা—

জলদে তড়িৎ-জ্বালা।

বকুল-সিঁথীটা পড়িছে সরিয়া,

অলকে অশোক-দাম ;

সুরভি নিঃশ্বাসে দুলিছে নোলক,

আঁখি-পদ্ম অভিরাম !

পড়িছে খসিয়া বেণীর মল্লিকা,

দুলিছে কর্ণিকা-দুল ;

বাম করে বারে রসাল মঞ্জরী,

দক্ষিণে পলাশ-ফুল।

ফুল-ধনু সম সুভুরু দু'খানি,

কপাল অরধ-চাঁদ ;

চিবুকে শোভিছে মৃগমদ-বিন্দু,

নয়নে কাজল-ফাঁদ।

চম্পক-বরণ চরণে নূপুর—

গুঞ্জরে মধুপ-দল ;

পদ-পরশনে শিহরে ধরণী,

তৃণ আরো সুকোমল !

কত সুখ-আশে, কত লাজে ত্রাসে,

আশে-পাশে দূরে চায় !

BANGLADARSHAN.COM

নব কুরুবক ফুল্ল মুখখানি  
গোলাপে রাঙ্গিয়া যায় !

সম্মুখে সরসী, বিমল আরসী,  
রূপ-আভা পড়ে জলে !  
বকুলের ছায়া কুল হ'তে সরে,  
ফুটে পদ্ম দলে দলে।

টগর-কিরীটে উষার কিরণ  
উছলি' পিছলি' লুটে ;  
মিলাল কুন্দের মধুর হাসিটী  
কুসুম্ভ-অধরপুটে !

চকিত নয়ন- সভয় ভ্রমর  
আকাশে উড়িতে চায় !  
কোথা ভাব-সখী, ভাষা-সহচরী !

কে পথ দেখাবে তায় ?  
পড়িল বসিয়া তমাল-তলায়-  
হৃদয়ে বিঁধিছে কি যে !

শিথিল শরীর, শ্লথ কেশ-বেশ,  
শিশিরে আঁচল ভিজে।

তরু লতা পাতা জিঞ্জাসে বারতা,  
হরিণী বিস্ময়ে চায় ;  
তটে উথলিয়া কাঁদিছে তটিনী,  
শ্বসিছে কাতরে বায়।

কে পথ দেখাবে, কেবা সাথে যাবে ?  
যাবে কোন্ স্বর্গপুরে ?  
জগতের জীব জানে না ত্রিদিব,  
নিজ সুখ-দুখে ঘুরে।

বসন্ত পলা'ল, মলয় লুকাল,-  
তুমি কি দেখ নি চেয়ে ?

BANGLADARSHAN.COM

কত ফুল ফুটে' পায়ে যে লুটাল,  
কত পাখী গেল গেয়ে !

## বরণ

ধর, ধর হৃৎ-পুষ্প, লহ উপহার !  
আজি এ মধুর প্রাতে,  
মধুর প্রভাত-বাত্তে,  
কি শুভ সংবাদ আসে প্রেম-দেবতার !  
গোপনে আপনে, নারী,  
আর না রাখিতে পারি –  
ছুটে কি আকুল শ্বাস আশা-মলয়ার !  
বুঝি দলে দলে ফুটে'  
পূর্ণ হ'য়ে পড়ি লুটে' –  
টুটে' পড়ে চারি ধারে সর্বস্ব আমার !  
তুলিতে তুলিতে ফুলে  
লহ গো আমারে তুলে' –  
গাঁথিয়া পর' গো গলে প্রেম-ফুলহার !  
ধর, ধর হৃৎ-পুষ্প, লহ উপহার !  
তুমি স্বর্গ-বনদেবী  
ভ্রমিছ সমীর সেবি',  
আমি মন্দাকিনী-কূল-নবীন-মন্দার, –  
জন্ম-জন্মান্তর ধরি'  
আশা স্মৃতি জড়' করি'  
গড়িয়াছি তোমা তরে স্বপন-সস্তার !  
তুমি পরিমল-সুখে  
আদরে দুলাবে বুকে,  
পবিত্র-কৃতার্থ হব পরশে তোমার !  
রাখ কিংবা দল' পায় –

কিবা তায় আসে যায় ?  
তোমারি একান্ত আমি—স্বতঃ উপহার।

## সংশয়-দৃষ্টি

কেন—কেন নিমীলিত নয়ন-পল্লব—  
অসহ্য কি শুভ বর্তমান ?  
নয়নে নয়নে এই নব অনুভব,  
প্রাণে প্রাণে আকুল আহ্বান !

এ কি লজ্জা ?—কই কোথা আরক্ত কপোল,  
স্ফুরিত অধরে স্থির হাস ?

সুধার সাগরে সেই সুধার হিল্লোল—  
জীবনের জড়ত্ব-বিনাশ !

এ যে রে সংশয়-দৃষ্টি—সংঘর্ষ বিষম,  
বর্তমানে ভবিষ্য-সন্ধান !

রুধি' রবি-শশী-আলো—সুখ-দুখ-ভ্রম,—  
মুহূর্তের প্রাধান্য-প্রদান !

কি দেখিলে ? কি বুঝিলে ? বল বল, প্রিয়া,  
প্রণয়ের কোন্ পথ শ্রেয় ?  
জীবন যৌবন ওই তুলাদণ্ডে দিয়া,  
এ প্রতীক্ষা—অতি ঘণ্য হয়ে !

BANGLADARSHAN.COM

## সস্তাষণ

আসি নাই ছলিতে তোমায়।  
ও মুখ হেরিয়া আজ মনে হয়, –তীর্থ ঘুরি’  
আসিয়াছি দেশে পুনরায়।  
প্রেমিক ত সদা চায় মিশে’ যেতে প্রেমাস্পদে –  
আপনারে বিলালে সে বাঁচে !  
মিলনে মিটে না আশা, বিরহে দারুণ তৃষা, –  
নিঃস্বার্থ ভাবিয়া স্বার্থ যাচে !  
দাও শিক্ষা, রূপবতী, যেখানে থাক না তুমি, –  
হেরি আমি সৌন্দর্য্য তোমার !  
ডুবিয়া তোমার রূপে – ভুলিয়া আমার সত্তা,  
তোমাময় হেরি ত্রিসংসার !  
জপিয়া বিন্দুরে এক ব্যাপ্ত হই বিশ্বময় –  
শিখা রে – শিখা সে প্রেম-যোগ !  
ঘুচে যাক জীবনের সদা সুখ-অন্বেষণ –  
জন্মগত চির স্বার্থরোগ !  
জন্মিয়া অনন্ত-মাঝে, বাড়িয়া অনন্ত-মাঝে,  
অনন্তের হ’য়ে অবতার –  
তুচ্ছ সুখে দুঃখে আর আত্মঘাতী হই কেন, –  
কেন্দ্র করি’ দেহ আপনার ?  
ধূমায়িত দীপ-শিখা দাও – দাও নিবাইয়া,  
উঠুক – উঠুক উষা হেসে !  
পঙ্কিল সরসীকূলে রেখ না ডুবায়ে আর,  
যাই – যাই পারাবারে ভেসে !  
চরণে বিশাল পৃথ্বী, পশ্চাতে উত্তুঙ্গ গিরি,  
শির’পরে উদার আকাশ –  
দাঁড়াও, শুভদা দেবী, মুক্তকেশে হাসিমুখে,  
বাসনার হোক সর্বনাশ !

দাও সে অজর প্রেম, দেবতার পুণ্যভাগ –  
চিরশুভ, সুন্দর, মহান !  
লও, এ হৃদয় লও, হৃদয়-সর্বস্ব লও –  
তোমার শ্রীপদে বলিদান।

## মিলনে

এই কি ধরণী সেই, স্বর্গ কভু নয় ?  
নহে কল্পলতা-কুঞ্জ, এ কি সে কানন ?  
নহে মন্দারের শ্রেণী এ তরুনিচয় ?  
নহে বিধাতার মূর্তি, এ কি সে তপন ?  
নহে অম্বরার শ্বাস, বহে কি মলয় ?  
নহে দেববীণা-ধ্বনি, ভ্রমর-গুঞ্জন ?  
এ কি নহে মন্দাকিনী, সে জাহ্নবী বয় ?  
এ কি আমি সেই দেহ, সেই প্রাণ মন !

বল, সখী, সত্য তুমি –নহ গো কল্পনা !  
সত্য-ধ্রুব সত্য এই হৃদয়-মিলন !  
স্বপন-ছলনা নহে, –এ প্রেম-চেতনা,  
জীবনের অন্তরালে অনন্ত জীবন !  
দরশে পরশে আমি হারয়ে আপনা,  
পাতিয়াছি দেহে মনে তব পদ্মাসন।

# শত নাগিনীর পাকে

শত নাগিনীর পাকে বাঁধ' বাহু দিয়া,  
পাকে পাকে ভেঙ্গে যাক এ মোর শরীর।  
এ রুদ্ধ-পঞ্জর হ'তে হৃদয় অধীর  
পড়ক বাঁপায়ে তব সর্বাঙ্গ ব্যাপিয়া !  
হেরিয়া পূর্ণিমা-শশী-টুটিয়া লুটিয়া  
ক্ষুভিয়া প্লাবিয়া যথা সমুদ্র অঙ্গির ;  
বসন্তে-বনান্তে যথা দুরন্ত সমীর  
সারা ফুলবন দলি' নহে তৃপ্ত হিয়া।

এ দেহ-পাষণ-ভার কর গো অন্তর !  
হৃদয়-গোমুখী-মাঝে প্রেম-ভাগীরথী,  
ক্ষুদ্র অন্ধ পরিসরে ভ্রমি' নিরন্তর

হতেছে বিকৃত ক্রমে, অপবিত্র অতি।

আলোকে পুলকে বরি', তুলি' কলস্বর  
করুক তোমারে চির স্নিগ্ধ-শুদ্ধমতি !

BANGLADARSHAN.COM

# এখনো রজনী আছে

এখনো সুদীর্ঘ ছায়া ঢাকি' তরুমূল ;  
এখনো সুদূর বাঁশী আলাপে মধুর ;  
এখনো ঝরিছে জ্যোৎস্না মলিন বিধুর ;  
এখনো বহিছে ঝরা করি' কুলু-কুল।  
এখনো টুটিছে ফুল, ফুটিছে মুকুল ;  
এখনো দেখিছে গিরি রবি কত দূর ;  
এখনো সুমন্দ বায়ু সুগন্ধ-আতুর –  
কেন তুমি, বনযুথী, সরমে আকুল !

সুগু-অলি-বন্ধ-পদুকলিকা-নয়নে  
রও, চির চেয়ে রও, লো মধু-যামিনী !  
অতনু-কম্পিত তনু,–অতৃপ্ত স্বপনে  
বাঁধ' চির-আলিঙ্গনে, কুসুম-কামিনী !  
এখনো দেবতা আঁখি জাগিয়া আকাশে ;  
এখনো দেবতা-শ্বাস ভাসিছে বাতাসে।

## যেও না

যেও না–যেও না তুমি, মলয়-সমীর,  
নিঃশ্বাসে প্রশ্বাসে তব করিয়া অধীর !  
শত ফুলরেণু-চাপে  
এ দেহ আবেশে কাঁপে !  
যেন কার অভিশাপে  
নীরবে যেতেছে প্রাণ হইয়া বাহির !  
তুমি, ফুলবন-সাথী, কোথা যাবে, হয় !  
এ দেহে চেতনা নাই, কে দিবে বিদায় !

# আসি তবে

আসি তবে, প্রেম-নিশা বুঝি বা পোহায় !

প্রত্যক্ষ আগত-প্রায়,

ভাষা আর না জুয়ায়,

শপথে সন্দেহ হয় –বিদায়, বিদায় !

ভাঙ্গিছে কল্পনা-ভ্রান্তি,

আসে বুঝি সুখ-শ্রান্তি ;

আসিলে বিরক্তি ঘৃণা র'বে না উপায় !

বিদায়, বিদায় !

অসমাপ্ত এ চুম্বন, অপূর্ণ পিপাসা।

এই ত প্রেমের বন্ধ, –

বাস্তবে স্বপনে দ্বন্দ্ব,

কবিতার চিরানন্দ কল্পিত নিরাশা !

খুলে দাও বাহু-পাক,

অপূর্ণ-অপূর্ণ থাক ;

আজ যদি কেঁদে যাই, –কাল ফিরে' আসা।

থাকুক পিপাসা।

থাকিতে সময় তবে বিদায়, ললনা !

মিলন চঞ্চল অতি–

বিরাগ-সমুদ্রে গতি ;

আর কেন স্বপ্নে মাতি থাকিতে চেতনা !

দেখিছ না পলে পলে

প্রেম মৃত্যুপথে চলে–

ভুলি' বর্তমান-ক্রমে ভবিষ্য-ভাবনা !

বিদায়, ললনা !

হা হৃদয়, বিনির্মিত রক্ত-মাংস-মেদে !

পরিমলে কুতূহলী,

ফুলে শেষে পদে দলি ;

তৃপ্তির নরকে জ্বলি অতৃপ্তির খেদে।

BANGLADARSHAN.COM

বুঝি না সঞ্চারী পরে  
স্থায়ি-রস মূর্তি ধরে ;  
অসীম মিলন স্থুরে সসীম বিচ্ছেদে।

## বিদায়

যে কথা-থাকিতে প্রাণ-ফুটিবে না মুখে,  
পলে পলে বুঝিতেছে কিন্তু প্রাণ মন !  
দেখ, এই দিবালোকে  
অশ্রু মুছি' স্থির চোখে,-  
হৃদয়ে প্রলয়-ঝড়, অন্ধদু' নয়ন !

যে অধর কাঁপিতেছে বলিবার তরে,  
সে অধরে একবার কর লো চুম্বন !  
শিরায় শিরায়, বালা,  
দেখ কি বিদ্যুৎ-জ্বালা ;

বজ্রানলে দেহে মনে সঞ্জানে দহন !

কি দিব বিদায়-চিহ্ন, তুমি তুলে' লও -  
বকুল চম্পক বেলা তোমারি সকল !

ধরার বসন্ত বটে,

আমি বৈতরণী-তটে

খুঁজিতেছি কোথা মৃত্যু-তুষার-শীতল !

যাও তবে-কি বলিব ! কভু কোন দিন

শুন যদি অভাগার হয়েছে মরণ, -

একদিন ধরাতলে,

এক বিন্দু নেত্রজলে

তুমাহত প্রণয়ের করিও তর্পণ !

# দু' দিকে

দু' দিকে ফিরাল মুখ নীরবে দু' জন,  
জন্ম মত পরস্পরে চাহি' একবার।  
পড়িল গভীর শ্বাস, মুছিল নয়ন,  
ঘুটিল না নয়নের তবু অন্ধকার !  
রহিল পড়িয়া পিছে পুষ্পিত কানন,  
সম্মুখে অপরিচিত সুদীর্ঘ সংসার !  
যায়-যায়-তবু যায়, বাধিছে চরণ,  
কে জানে পৌঁছাবে কি না গৃহে যে যাহার !  
যায়-যায়-তবু যায়, বিশৃঙ্খল নয়নে  
রাখিয়া কলঙ্ক-রেখা সরে' গেছে জল।  
যায়-যায়-শূন্যে চায়, অতি শূন্য মনে,-  
ছিন্ন ভিন্ন চূর্ণ সব, শূন্য ধরাতল !  
চুম্বন-চিহ্নটা সুধু অধর-শয়নে,-  
জীবনের চিরস্মৃতি, মরণ-সম্বল।

BANGLADARSHAN.COM

## সে নেত্রে

সে বিশাল-নেত্রে কাল সৰ্ব্ব মনঃপ্রাণ  
দিতাম ঢালিয়া যদি চুম্বনে চুম্বনে !  
নির্লিপ্ত-নয়নে চেয়ে, চঞ্চল-চরণে  
পলা'ত না দূরে আজ হরিণী-সমান।  
ঝরিত সে আঁখি হ'তে কত গীতিগান,  
সুখে স্বপ্নে মুগ্ধ করি' প্রেমলুরু জনে !  
প্রশান্ত জলদ সম নয়নে নয়নে  
ঘুরিত-ফিরিত সদা কি কাব্য মহান্ !

পূর্ণেন্দু-কিরণে যথা নীল সিঙ্কুজল  
ঝক-ঝক জ্বলে,-শত বিজলী-প্রতিমা !  
প্রভাত-কিরণে যথা নব মেঘদল,-  
প্রান্তে লুটে রৌপ্য-হাসি,- স্বর্গ-মধুরিমা !  
বসন্ত-মিলনে ধরা শ্যামল বিহুল-  
রূপসী লভিত, আহা, প্রেমের মহিমা !

BANGLADARSHAN.COM

## হেমন্তে

আকাশ হতেছে ক্রমে কুঞ্জটি-মলিন,  
নিষ্প্রভ হতেছে শশী, সুদীর্ঘ রজনী ;  
নিশা-শেষে অশ্রুকণা ফেলিছে ধরণী ;  
সমীর শীতল ক্রমে, মৃত্তিকা কঠিন।  
সন্ধ্যার আঁধার মুখ, তারা রশ্মিহীন ;  
তরলতা শুষ্কদেহ, -শুকপত্র মূলে ;  
স্রোতস্বতী শীর্ণ-কায়া-হংসী নাহি কূলে ;  
ক্ষেত্র বিদারিত-দেহ, ক্রমে ক্ষুদ্র দিন।

হৃদয়, উঠ রে উঠ, বৃথা আর বসি'  
বৃথা এ মমতা-গীতি-কাতর ক্রন্দন !  
বৃথা এই সযতন স্বপন-কর্ষণ -  
নির্গন্ধ কুসুম সম পথ চেয়ে শ্বসি !

দেখিবে না-বুঝিবে না আমারি প্রেয়সী, -  
যদিও আমার দুখে কাঁদে বিশ্বজন !

BANGLADARSHAN.COM

## হৃদয় সমুদ্র সম

হৃদয় সমুদ্র সম আকুলি' উচ্ছ্বসি'  
আছাড়ি' পড়িছে আসি' তব রূপ-কূলে !  
হৃদয়-পাষণ-দ্বার দাও-দাও খুলে' !  
চিরজন্ম লুটিব কি ও পদ পরশি' ?  
অনুদিন-অনুক্ষণ দুরাশায় শ্বসি'  
বৃথায় পশিতে চাই ওই মর্ম-মূলে !  
লক্ষ্যহীন-নেত্রে, নারী, সাজি' নানা ফুলে,  
মরণ-লুপ্তন হের,-স্থির গর্বে বসি' !

কি মমত্ব-হীন তুমি, রমণী-হৃদয় !  
এত বর্ষে, এই স্পর্শে, এ চির-ক্রন্দনে,  
এত ভাষ্যে, এই দাস্যে, এ দৃঢ়-বন্ধনে, -  
দানব সদয় হয়, ব্রহ্মাণ্ড বিলয় !

বিফল উদ্যম, শ্রম, বিক্রম, বিনয় -  
নিত্য পরাজিত আমি তোমার চরণে !

BANGLADARSHAN.COM

# প্রেম কি বুঝান' যায়

প্রেম কি বুঝান' যায় ?  
নয়নে নয়নে না মিলিল যদি,  
কেমনে বুঝাব তায় ?  
চলিয়া সে যায়, ফিরিয়া না চায়,  
আমি শুধু চেয়ে থাকি ;  
বুঝিতে চাহিলে সকলি বুঝিত, –  
আঁখিতে মিলিত আঁখি !

প্রেম কি বুঝান' যায় ?  
নিশাসে নিশাসে বুক ভেঙ্গে আসে,  
কেমনে বুঝাব তায় ?  
দাঁড়াইলে কাছে, দূরু-দূরু হিয়া,  
গুরু-গুরু গরজন ;  
বুঝিতে চাহিলে সকলি বুঝিত, –  
দেহে মনে প্রাণপণ !

প্রেম কি বুঝান' যায় ?  
কথায় কথায় মরম-ব্যথায়  
কেমনে বুঝাব তায় ?  
বলি-বলি কত, মুখখানি নত,  
অধরে উঠে না ফুটি' ;  
বুঝিতে চাহিলে সকলি বুঝিত, –  
হৃদয়ে পড়িত লুটি' !

প্রেম কি বুঝান' যায় ?  
আভাসে বিশ্বাসে যদি না বুঝিল,  
কেমনে বুঝাব তায় ?  
কোথা তার আদি, কোথা তার অন্ত,  
কোথা তার মধ্যদেশ !  
একে সদা, হয়, অন্য হ'য়ে যায়,  
এত লাজ-ভয়-ক্লেশ !

BANGLADARSHAN.COM

প্ৰেম কি বুঝান' যায় ?  
না দেখে দেখুক, না বুঝে বুঝুক,  
সুখ দুখ তার পায়।  
কোথা রবি উঠে, কোথা ফুল ফুটে ;  
ছুটে কেন পরিমল ?  
দেবতা আকাশে, ঋষি বনবাসে ;  
মাঝে কেন আঁখি-জল ?  
পরবাসে পতি, মরে কেন সতী ?  
মতি-গতি পতি-পায়।  
আপন মরণে আপনি বরিয়া,  
কেমনে বুঝাব তায় !

BANGLADARSHAN.COM

# সংসারে

দে রে, দে রে, ছেড়ে দে রে, ছুটে' গিয়ে কেঁদে আসি !

পারি না বহিতে আর এ মায়া-মমতা-রাশি।

এ কি স্নেহ, এ কি ভয়, এ কি হাসা, এ কি কাঁদা !

ফিরিতে দিবি না পাশ—শত নাগ-পাশে বাঁধা !

গেল, গেল, সব গেল—অকূল সমুদ্র-আশ,

—ও ক্ষুদ্র ইঙ্গিত-পথে ছুটে' ছুটে' বারো মাস !

কোথা সে পৌরুষ-গর্ব—বিশ্বত্ৰাস সে গর্জন !

সে উল্লাস, সে উচ্ছ্বাস, উৎক্ষেপণ, বিক্ষেপণ !

ছেড়ে দে, পাগল প্রাণ উধাও ছুটিয়া যাক !

পুষ্প-পরিমল-ভারে যে থাকে—পড়িয়া থাক !

দুরন্ত প্রলয়-ঝড়—আছে তার শত কাজ,

অঞ্চল-বীজন হ'তে আসে নি সে ধরা-মাঝ !

পড়, পড়, খসে' পড়, হাহা, তৃণ-গুল্ম-বাস !

উঠুক আকাশে গিরি উদগারি' অনল-শ্বাস !

জ্বলে' যাক চিরস্থির-কুঞ্জটিকা-অন্ধকার !

ক্ষুদ্র নির্ঝরিণী-ধ্বনি—শত প্রতিধ্বনি তার !

লুটাক চরণে ধরা, ইঙ্গিতে বর্তন-পথ !

পারি না থাকিতে আর স্পন্দহীন চিত্রবৎ।

আকাজ্জা—বা দুরাকাজ্জা, বুঝিতে সময় নাই,

ধূধূ ধূধূ করে প্রাণ—হুহু হুহু ছুটে' যাই !

কি মহা-জীবন-খেলা—মেঘে বজ্রে হুড়াহুড়ি,—

দাপটে ঝাপটে ধরা ভ্রমে কোথা গুড়িগুড়ি !

আহাহা সমুদ্রে ঝড়ে কি সম্ভাষ, কি আরতি,—

মূর্ছিত দেবতাগণ, স্তম্ভিত ব্রহ্মাণ্ড-গতি !

# সখীর উক্তি

যায়-ওই যায় !

আকুল ঝটিকা ওই ছুটিল সাগর-মুখে,  
হইল না ঠাঁই তার এ ক্ষুদ্র ধরায় !  
কাটিল না তার বেলা, ল'য়ে লতা-পাতা-খেলা,  
ল'য়ে তটিনীর উষ্মি, কুসুম-কুন্তল-  
প্রাণে তার এত কোলাহল !

যায়-ওই যায় !

ধূধূ সাগর-নীরে, ধূধূ বালুকা-তীরে,  
ধূধূ মধ্যাহ্ন-রৌদ্রে আনন্দে লুটায় !  
কল্পনার শত চিত্র- কত-না নায়িকা মিত্র  
হয় ওতপ্রোত নিত্য হৃদয়ে যাহার, -  
সদা ঢুলু-ঢুলু প্রাণে চলিবে তোমার পানে,  
এ যে রে অসাধ্য কর্ম্ম-আত্মহত্যা তার !

দাও-ছেড়ে দাও !

কেন নিমেষের তরে মাঝে তার এসে পড়ে'  
চূর্ণ হ'য়ে যাও !

দাও-যেতে দাও।

ও যে জগতের দূরে - চল চাই অন্তঃপুরে,  
সজল নয়নে মিছে পথ-পানে চাও !  
ওর শুধু খেলা সার - চূর্ম্মার ছারখার ;  
নিমেষের সুখ সাধ, নিমেষের ক্লেশ ;  
নাহি গত-সুখ-স্মৃতি, নাহি পর-দুখ-ভীতি,  
কি করি-কি করি সদা, কর্তব্য অশেষ !

পরপদে প্রাণ দিয়া, বিনামূলে বিকাইয়া,  
সাধিয়া রমণী-ধর্ম্ম, -কেন ভগ্ন মন ?  
হোক তার জয় জয় নিত্য এই বিশ্বময় ;  
শত পরাজিত-মাঝে তুমি এক জন -

উঠ, সখী, মুছহ নয়ন !

## প্রেম-শিশু

১

মৃত আজি প্রেম-শিশু, দাও গো সমাধি তায় !

এই তটিনীর কূলে,

এই বকুলের মূলে,

এই শুভ্র জ্যোৎস্না-তলে, তৃণ-ফুল-বিছানায়।

বকুল ঢাকুক ফুলে, ব্যজন করুক বায়,

শিশির ঝরুক শিরে,

শশী চা'ক ফিরে' ফিরে',

তটিনী কাঁদুক তীরে লুটিয়া লুটিয়া পায়।

কিছুতে সে বুঝিল না, – বুঝি নাই সে কি চায় !

নিজ হৃদি শূন্য করি'

দিনু তার হৃদি ভরি'

কত সুখ-সাধ-আশা, কত স্নেহ-মমতায় !

এত যত্ন, এত স্বপ্ন, এত সুপ্ত বাসনায় –

তবু সে পেলে না সুখ,

দিন দিন ম্লান-মুখ,

মুদিল নয়ন-যুগ কি লুকান বেদনায় !

মিছা সুখ, মিছা দুখ, মিছা ভয় ভাবনায় !

কাঁদিয়া কি হবে ফল ?

মুছ নয়নের জল,

চল ধীরে ঘরে ফিরি', দুই পথে দু'জনায়।

২

তোমায় আমায় যদি দেখা হয় পুনরায়, –

তুমি অন্য দিকে চেও,

তুমি অন্য পথে যেও, –

পথের পথিক মোরা, কেহ নাহি জানে কা'য়।

দিন যায়, মাস যায়, বর্ষ যায়, যুগ যায় ; –

যেতে এই পথ দিয়া

যদি শিহরয় হিয়া,

বিষণ্ণ-সায়াহে কোন নব ঘন বরিষায় ; –

আসিও সমাধি-পাশে, ধীরে ধীরে পায়-পায় ;

কাতর সমীর-শ্বাসে

গত-কথা মনে আসে,

আশে-পাশে কায়া মোর ছায়া সম মিশে' যায় ; –

আকুলিয়া উঠে প্রাণ, –জীবন ফিরিতে চায়,

হৃদয় কাঁদিয়া কয়, –

ধন-জন নয়-নয়,

হারায়েছি যেই ভ্রম, –সে-ই সুখ এ ধরায় !

মুছিতে নয়ন দুটা হয় ত দেখিবে তায়, –

আবার সমাধি খুলে',

দুটা কচি বাহু তুলে',

উঠিতে তোমার কোলে কত-না আগ্রহে চায় !

BANGLADARSHAN.COM

# কবিতা-বিদায়

যাবে কি একান্ত তবে ? যাবে তুমি, প্রিয়া !

সকলি কি ফুরাল চকিতে !

জীবনের সব সাধ, সব প্রেম দিয়া,

তবু আমি নারিনু রাখিতে ?

চাহি নি জগৎ-পানে, তোমাতে চাহিয়া

আজীবন দেখেছি স্বপন ;

আজ-জগতের দ্বারে, কার কাছে গিয়া

কি মাগিব ? সবই যে নূতন !

তোমার নয়ন হ'তে ফিরালে নয়ন,

এ জীবন শূন্য মনে হয় !

কোথা উষা, কোথা আলো ! কেবল দহন ;

কোথা শোভা-বিকাশ-বিস্ময় !

কোথা শশি-তারা-ভরা নিখর আকাশ,

চিরঞ্জির পূর্ণিমার রাত !

জীবনে মরণে সেই গভীর বিশ্বাস,

অলক্ষ্যে অঙ্গুরা-যাতায়াত !

নিষ্ফল সাধনা, আজ-অদৃষ্টে আশ্রয় ;

গেছে স্বর্গ সরি' বহু দূরে ;

নাহি দেহে বসন্তের আকাজক্ষা দুর্জয় –

রূপে রসে, গন্ধ-স্পর্শ-সুরে।

সে মত্ত হৃদয় নাই-সৌন্দর্যে উচ্ছল,

সর্ব্ব বিশ্বে আছাড়িয়া পড়ি !

সজীব নিজীব নাই-কল্পনা-বিহ্বল,

সর্ব্বভূতে আপনা বিতরি !

সে পূত মাহেন্দ্র-ক্ষণে যে দাঁড়াত আসি' –

হোক চিত্তে মূর্তিতে সঙ্গীতে,

দিয়া নিজ আশা ভাষা, প্রেম রাশি রাশি,

মজিতাম তাহারি ভঙ্গিতে !

BANGLADARSHAN.COM

দিতাম নয়নে তার আমার চেতনা,  
হৃৎ-রক্তে রঞ্জিয়া কপোল, –  
লতিকার নব পর্ণে পুষ্প-সস্তাবনা,  
সৌন্দর্যের বিচিত্র হিল্লোল !

তুমি শব্দে ভাবে ছন্দে কেন এসেছিলে,  
নতমুখী নবীনা ললনা ?  
দেখি নি-ভাবি নি কিছু আমি যে অখিলে,  
বুঝি নাই নারীর ছলনা !  
ত্রস্তে ব্যস্তে প্রেমমালা পরাইনু গলে,  
আশার কিরীট দিনু শিরে ;  
ইহ-পরকাল মম দিয়া পদতলে –  
আজ আমি কোথা যাব ফিরে ?

সে যৌবন-কল্পনায় নিজ প্রাণ দিয়া  
জড়ে কেন দেই নি চেতনা ?  
দৃষ্টিহীন নেত্রে-চির রহিত চাহিয়া !  
আমার সে প্রথম কামনা !  
কেন অঙ্গে অঙ্গে তার দেই নি ছড়ায়ে  
আমার সে হৃদয়-স্পন্দন ?

আপনার বাহুপাকে আপনা জড়ায়ে  
দেখি নাই প্রেমের স্বপন ?

আজন্ম তপস্যা-ফলে লভি উপহাস –  
তবু কেন বিরহ-বেদন ?  
মাদকতা-অবসাদে মাদক-পিয়াস,  
ভ্রম-ভঙ্গে ভ্রম-অন্বেষণ !

কোথা তুমি, মহাশ্বেতা, অচ্ছাদের তীরে  
ল'য়ে তব অক্ষয় যৌবন !  
কেন আর, কাদম্বরী, মৃত চন্দ্রাপীড়ে  
প্রেম-ভরে করিছ চুম্বন !

যাও তবে, প্রাণাধিকা, মুছিনু নয়ন,  
রুদ্ধ অশ্রু চিররুদ্ধ থাক।

BANGLADARSHAN.COM

কেন বিদায়ের ছল, নিঃশ্বাস সঘন,  
সান্ত্বনার অর্থহীন বাক্ !  
বৃথায় আশ্বাস-দান-হ'য়ো না নিষ্ঠুর,  
আমি অতি কৃপাপাত্র-দীন ;  
তোমার বিজয়-গর্বে আমি শত-চুর-  
শ্রেয় প্রেয় উভয়-বিহীন !

যাও তবে ! মৃত্যু পরে যদি দেখা হয়, -  
ভুবলোকে-কাশ্যপ-আশ্রমে ;  
-ক্ষৌমবাস-অন্তরালে কম্পিত হৃদয়,  
অভিমনে, লজ্জায়, সম্রমে !-  
অযশ-ভবিষ্য-পুত্র কৌতুকে জিজ্ঞাসে, -  
'দু' জনার কি সম্বন্ধ-বাদ ?'  
নারীর সরল-প্রেমে, সহজ-বিশ্বাসে  
কহিও, ক্ষমিও অপরাধ।

BANGLADARSHAN.COM